



Upernaakkut 2017-mi ataatsimiinnissamut ilaqutariit pissakinnerusut akunnattumillu aningaasarsiallit nammineerlutik illutaarsinnaanerat pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)
(Siullermeenera)

Partii Nalerap siunnersuummini tunngavilersuutigaa pissakinnerusut akunnattumillu aningaasarsiallit nammineerlutik illutaarsinnaannginnerat. Aamma siunertamut tassunga Aningaasanut Inatsimmi immikkoortitsisoqarsimanngitsoq.

Naalakkersuisut akissuminni nassuiaatigaat Partii Naleraq tunngavilersuummini ilumuunngitsoq. Pissutaavoq Inatsisartut kontomut pingaarnermut 72.06.51-mut - Illunik tunisineq - oqaasertaliussanut oqaaseqaammik akuersissuteqarnikuunerat. Oqaasertaliussanut oqaaseqaat atorlugu ilaqutariinnut ataasiakkaanut illut illullu affarleriillu attartortunut realkreditimit aningaaservinnillu taarsigassarsinnaanngitsunut tunineqarsinnaapput, illup nalingata 275.000 koruunit ataassimappagu. Pisissutit akilersorneqassapput qaammammoortumik naafferaanikkut.

Tamatuma saniatigut maannakkut attartortumiit piginnittumut aaqqissuussineq illoqarfinni Nuup avataaniittuni iluaqutissartalerujussuuvoq aamma periarfissinneqarmata ilaqutariit naliginnaalluartut annerusumik isertitaqanngikkaluarlutik illusisinnaanerat.

Suliniutissat Partii Naleqqap ugartugai taamaasillutik pioreerput.

Siunnersuut itigartinneqassasoq inassutigaarput.